

欽定剿平粵匪方略

欽定勦平粵匪方略卷一百六十八 丁巳年

七年正月初六日

己未

兩江總督怡良江蘇巡撫

趙德轍奏言 臣等接奉

諭旨令另派實任大員督辦大營糧臺事宜查有江蘇

臬司楊能格歷署藩司素稱明幹人亦公正堪以督辦糧臺事宜業經咨行和春等查照

同日德興阿翁同書奏言瓜州賊匪因疊經官

兵痛勦近於句容等處撥來賊黨二千餘名窺伺西北一帶合謀竄出擄糧臣等親往土橋一路履勘知該處池西二里許五新橋地方爲西北山往來咽喉必須添設營盤以資扼堵因將千總詹啟綸所帶義勇五百餘名移往紮營正在掘濠築壘賊衆數百人突出撲營經富明阿王巨孝等帶領馬步兵山間道潛軍邀擊賊不

虞我師猝至已自披靡其後隊見前行之賊被
我兵槍礮轟壓首尾莫救向原路奔回其前隊
百餘人爲官兵夾擊盡殲無一返者二十六日
東岸又出賊三百餘人由虹橋直竄被總兵鞠
殿華等勦退次日臣等豫飭水陸各營分擣老
巢東西兩岸同時進攻兵勇踰濠直撲賊壘轟
擊多時因風轉西北上下游師船均不能攏近

瓜隄遂卽撤隊適巡勇緝獲奸細一名搜出逆文七件係逆首吳如哮差赴詹啟綸義勇營盤送信文內勸其仍行入夥幫拒大兵誘以高官重賞等語可見逆情叵測若非招回舊黨卽係反間詭謀臣等查詹啟綸義勇自在連鎮大營投順後撥來揚營頗知嚮義因坦懷相待示以不疑仍飭嚴加鈐束毋啟猜嫌均奏入報

初九日

壬戌

和春奏言句容悍賊甚多雖屢有斬

擒而深溝高壘拒守甚堅十二月十八等日張

國棟明安泰督率副將王浚朱承先等分途進

攻午後突出賊千餘人我軍奮力攻擊斃百餘

名餘賊敗退二十三日南門並城外賊營復出

六七千人意圖圍攻我軍南路營盤卽飭王浚

等由右路進攻張國樑帶隊策應多廉等由中路擊勦雷丙陽等帶兵接應明安泰率同色爾固善由東土岡相機進勦臣和春督兵前往調度各軍分途直前立斃賊匪無算該逆拌死抵拒卽令官兵連開擡礮擊倒執旗悍賊數名落馬賊勢稍卻張國樑統軍擁進該逆驚潰兵勇盡力砍殺死者枕藉正得手間忽有馬步賊千

餘人由東南繞出欲抄我軍後路臣和春親督馬隊迎勦揮兵奮擊賊勢大敗復經明安泰等攔截張國樑率兵追勦亦卽馳至我軍會合齊力衝殺追擊數里搶至濠邊接仗五時之久約斃賊匪一千餘名砍獲首級一百餘顆生擒六十三名內騎馬賊二十餘名奪獲軍械三百餘件贏馬五十餘匹二十七日臣與張國樑復帶

馬步隊分路進攻南門突出賊四千人兇猛
撲來各軍分途迎擊槍礮絡繹斃賊不少左右
圍抄賊勢不支張國樑匹馬衝入衆軍一擁直
前殲擒甚衆追至濠邊約斃賊四五百名生擒
七十名砍獲首級五十一顆奪獲軍械馬匹二
百餘件溧水逆匪於十二月十二日由鄔山一
帶移至西門外修築礮臺傅振邦派李定太等

帶勇攻勦至山坡後埋伏派虎坤元等往攻北門魯占鼈等進攻小東門通判博恩等進攻大東門並派吳朝清等於北門外截賊糧食托克通阿等馳往策應該總兵與虎嵩林往來調度於北門外十里之大路村見逆匪數百人擁護車輛吳朝清揮令兵勇連開槍礮托克通阿等率領馬隊左右分抄立刺悍賊數十名奪獲米

糧食物七八十車適北門出賊千餘人來援經
虎坤元等迎截勇氣百倍痛加擊刺賊敗入城
李定太等進攻西門令衆軍詐敗該逆追趕約
有一里之遙伏兵齊起傅振邦等又兩面圍抄
逆匪奔敗自相踐踏官兵追殺又斃無數趕至
山坡所築礮臺工未及半立即拆毀填滿外濠
將所釘梅花椿板片等件焚燒約斃賊五百餘

名次日該逆於前築礮臺處所偷築營壘傅振
邦虎嵩林馳往攻勦並令我軍於西門外添營
三座官兵銜枚急進逆衆正在搬取木石紛紛
起築見我軍大至卽分路來撲兵勇奮力急攻
斃賊數百名該逆敗退守備高永堂等馳至城
根正欲攀援而上城內突出賊二三千人高永
堂匹馬衝殺立刺悍賊數十名被城上大礮擊

傷腦頂立時陣亡龐大文手刃執大黃旗賊目
七名被賊槍傷傅振邦等從西門城下抄來截
住該逆歸路賊衆兩面受敵我軍盡力痛勦逆
屍徧野遂趕築營壘十五日各營相地進紮該
逆突出大股來撲傅振邦督軍痛擊斃賊不計
其數賊敗潰兩日共約斃賊八九百名生擒六
十一名十六日督同魯占鼇等於大小東門外

扼要築壘移營前進工將及半城內出逆匪四
五千人兵勇分途迎殺魯占鰲等追至城下賊
衆敗退逃回馬永清馬文美均陣亡官軍卽在
西門外高山紮營西北二門又出賊五千餘人
來撲我軍迎擊殺賊山積賊衆奔逃追至濠邊
俱被殲擒仍飭令趕緊攻勦迅圖克復參將馬
永清等臨陣捐軀應請

旨飭部從優議卹奏入

上諭內閣曰此次勦賊陣亡之參將馬永清守備高永堂五品藍翎馬文美殺賊捐軀深堪憫惻均著交部從優議卹

初十日

癸亥

福興奏言查江西自袁州克復後臨

江瑞州吉安匪勢尙衆均有官軍分投攻堵其九江一城聞楚師水陸並下卽可合力進逼惟

撫州建昌之賊分踞各城肆行奔突兵力不敷
兼顧伏查撫州接壤廣信爲浙中門戶逆匪大
股聚集府城自該郡以至建昌如東鄉金谿瀘
溪南豐新城各屬匪蹤徧地幾成賊藪西達吉
臨等處該逆又復聯絡一氣往來自如刻下若
能添集兵力卽由此路進兵以次勦洗不但屏
蔽廣信兼可東西兩路夾擊使匪不能趨救吉

臨於該二郡勦辦事宜亦易得手臣現在由廣
信行走自應以先勦撫州一路爲扼要惟原帶
之兵僅有千名不敷堵勦昨經函商曾國藩文
俊等酌調得力兵勇來營稍期厚集臣卽日由
玉山入江西境一俟行入廣郡再行察看情形
督兵前進

福興又奏言江西全省勇多兵少兵則知有紀

律勇則甚難駕馭貴溪之勇因口糧缺乏卽挾制滋鬧撫州一潰收輯之餘尙有三四千名臣此去不能舍之不用惟須有兵制之該省兵力旣屬不敷副將張從龍及署副將琳潤所帶閩兵自建昌挫敗後退守邊境之杉關地方不知有無潰散臣擬咨督臣王懿德仍令張從龍等統領原帶之兵隨營進剿並懇

飭調粵東精兵一二千名由間道行走入江該省參將
衛佐邦久於行陣膽識俱優署參將曾廷相人
亦明白此時臣隨營將才實少應請

旨飭下兩廣督臣卽令該二員管帶前來歸臣調遣奏
人

上命軍機大臣傳諭福興曰江西大股逆匪聚集撫州
該將軍由廣信一路前進以次勦洗籌畫尙屬周妥

卽著咨調張從龍所帶閩兵與該將軍原帶之兵自
爲一軍統歸節制江西如有派撥兵勇更可聯絡聲
勢相機進剿所請調廣東兵一二千名由間道入江
已諭葉名琛酌量辦理惟該省現有軍務能否調兵
尙未可定該將軍惟當先就現有兵力迅圖剿辦

上又命軍機大臣傳諭葉名琛曰福興會剿江西逆匪
擬由廣信先剿撫州一路因所帶兵力過單請調粵

東精兵一二千人交參將衛佐邦管帶從間道入江
聽調自應酌量添撥著葉名琛妥籌調派前赴福興
軍營毋稍延誤

上又命軍機大臣傳諭王懿德曰江西賊氛猖獗該省
勇多兵少本屬難資控制此次福興前往會剿所帶
兵僅千名實形單弱該將軍現擬先勦撫州一路福
建援剿江西之兵前因建昌失利張從龍琳潤等暫

退杉關等處嗣據王懿德奏復添調福甯漳泉兵勇一千六百名馳往分布著王懿德卽飭該副將等所統兵勇悉歸福興調遣相機前進不得徒事株守致誤機宜

同日駱秉章奏言臣前調卽選道王鑫帶所部勁勇由臨湘龍窖源進駐通城搜捕土匪整頓團練漸有起色適報崇陽之石屋洪橋雷裕等

堡團民連日與賊交戰先勝後敗王鑫率勇急
援之賊分三路前來王鑫設伏待之陣斬悍賊
百餘賊衆大奔追至龍船港賊背水回拒我兵
擊敗之追至官塘畈白泉橋崇陽縣城之賊出
城援應與官軍遇又敗之沿途斃賊約數百人
生擒先鋒賊目九名賊不敢踞城相抗遁至白
霓橋十一月十一日王鑫出隊剿白霓橋之賊

派遊擊朱南桂等由左路高回嶺進都司陳品
南等由右路子岸進王鑫自率湘勇由中路進
右路官軍先到賊整隊抗拒易普照匹馬陷陣
連斫多賊賊陣始亂百長唐清揚馳馬賊之朱
南桂等由左路掩至陳品南等復由右路斜擊
之官軍縱橫蕩決連斬騎馬賊目十餘名斃賊
五百餘名王鑫縱兵追截直至通山縣二都地

方沿途斬獲無數生擒五十五名奪獲羸馬十五匹旗幟槍械千餘件崇陽遂無賊蹤王鑫派朱南桂等進勦蒲圻踞城賊目梁一舉逃竄興國適江西武甯敗匪由建昌折回興國併屯州城聞王鑫方攻蒲圻合力潛犯崇陽二十一日出賊七八千名至通山號稱數萬由沙坪界頭而來抵白霓橋五路撲營王鑫豫伏以待賊衆

漫山而至先撲官軍營盤湘勇示之以怯賊趨擁而進伏兵從林中發劈山礮賊旗紛紛倒地王鑫發號振鼓各路齊進橫衝側擊頃刻屍橫遍野羣賊亂奔大溪山南門洲伏兵截之於前大隊從後猛追之陣斬騎馬賊目八名追至白霓橋約共斃賊二千餘名忽白霓橋股匪出而接應官軍又擊敗之追至路口賊翻山四竄生

擒賊目五十四名奪獲大黃旗二百九十餘面
擡鳥槍刀矛一千餘件二十五日王鑫率軍追
至通山賊又竄回興國州通城崇陽蒲圻通山
現已無賊當派官軍分駐重兵臣又札調王鑫
暫駐岳州如鄂省上游江西邊界有警卽當出
其不意捲甲赴之以壯聲勢奏入

上諭內閣曰此次官軍越境勦捕通城等縣迅就肅清

洵屬著有微勞在事出力文武員弁著駱秉章查明
保奏

十二日 乙丑 福濟奏定三鄭魁士奏言無爲州瀕

臨大江爲賊出沒之區署知州葉藩募勇三千
餘名於水路倉頭鎮陸路文城壩紮營七座不
意上月初旬武漢黃蘄及甯國諸賊沿江直下
數道並進金陵賊衆復由裕溪駛入突至襄安

運漕等鎮水路匪船三千餘號礮船二百餘號
共八九萬人逆首陳玉城等分撲州城該署州
親往斗澗壩及塔橋地方迎勦倉頭各營盤被
賊圍撲經該署州馳往督勦賊勢甚盛千總孫
芝蘭繞道來援合力鏖戰斃賊數千無如該逆
冒死衝鋒愈殺愈衆襄安另股又由東關城橋
小路撲來團練潰散賊已抵城該署州抽勇四

百名回城救護力戰敗潰該署州出城招集潰
勇暫住北門外舊壘運漕又來賊數萬獨力難
支遂至失守斗澗壩營盤亦以絕糧圍困傷亡
相繼遂至潰散署知州葉藩雖與守備不設者
異究屬咎有難辭應請

旨革職責令帶罪自效臣等在桐攻勦猝難制勝實屬
他顧不遑且沿江各州縣防不勝防巢縣東關

偏近無爲尤爲喫緊臣已飭總兵嵩瑞等帶兵
勇二千餘名並咨德興阿速撥馬隊一千名一
而檄催郝光甲帶陝兵九百餘名星馳巢縣會
合堵剿第皖省兵力單弱不敷分布仰懇

聖恩迅撥直隸正定宣化鎮兵二千名吉林馬隊二千
名並飛飭楚北酌撥得勝兵勇由蘄州取道太
湖水陸並進直搗安慶以分下游賊勢

福濟奏定三鄭魁士又奏言臣等正在繕摺間
據報賊衆數萬一股攻撲巢縣一股攻撲東關
總兵扎隆武帶兵迎擊該逆由南門搭橋繞越
巢城直趨夏閣並據藩司畢承昭等稟稱廬州
居民紛紛遷徙存城兵僅二百餘名勢甚危急
各等語廬州爲江北關鍵大局所關而桐賊兇
悍我軍左迎右拒抽撤亦復爲難臣福濟卽統

帶兵勇一千餘名由桐拔隊馳抵廬州察看情
形再行抽撥其桐城堵剿事宜卽交臣秦定三
臣鄭魁士會同辦理嵩瑞一軍現已飭赴三河
嚴堵湖路總兵扎隆武駐紮東關不能援應巢
縣致賊竄夏閣一帶與署巢縣知縣張葆均屬
咎無可辭請

旨將扎隆武暫行革職張葆卽行革職仍責令實力進

勦奏八

上命軍機大臣傳諭福濟秦定三鄭魁士曰該逆糾合大股復陷無爲竄及夏閣廬州情形喫緊福濟已帶勇赴廬惟桐城賊尙兇悍兵勇勢難多調自應添撥援兵湖北前調吉林等處馬隊已諭官文酌分一千名飭赴廬州助勦現在楚北水軍戰艦已抵九江或可沿流東下攻安慶以分廬州等處賊勢秦定三鄭

魁士務當迅克桐城庶可合兵一處福濟卽飭帶兵
各員實力防勦毋得專待外援致有貽誤

上又命軍機大臣傳諭官文胡林翼曰前因英桂奏請
調撥湖北馬隊當諭官文酌調一二千名前赴亳州
此時無爲失陷皖省緊要卽著該大臣等分撥一千
名赴皖協勦現在湖北水軍已在九江獲勝若能分
水陸兵勇直擣安慶以牽賊勢則江北之賊當不致

肆行猖獗該大臣等務須統籌全局酌量辦理不可
稍存畛域之見

上諭內閣曰逆匪竄撲無爲州城署知州葉藩募勇守
禦先往斗澗壩及塔橋地方堵剿嗣復帶勇回城救
護力竭不支州城復陷葉藩著卽革職責令帶罪克
復城池

上又諭內閣曰安徽逆匪攻撲巢縣東關繞竄夏閣總

兵扎隆武等未能先事防堵實屬援應不力湖南綏靖鎮總兵扎隆武著暫行革職署巢縣知縣張葆著卽革職仍責令實力進剿以贖前愆

十四日丁卯官文胡林翼奏言臣等接奉

諭旨令調吉林黑龍江馬隊赴皖查東省馬隊陸續遣撤及調赴豫省留楚省者不足二千名實堪調用者僅一千五六百名派往襄陽二百名調赴

武昌南岸三百名在襄陽黃州協防北路者又
三四百名其都興阿統帶由北路下勦者數百
名尙須蓄其銳氣間日輪替出陣其馬匹連年
打仗倒斃尤多竭力設法添買尙未補足刻下
武漢兩岸僅存兵勇三四千名全恃下游馬隊
水師堵禦追勦且黃梅廣濟後路或上通德安
或毗連豫省尤慮宿太逆黨窺伺北竄經臣等

諄飭王國才等於黃屬要隘節節籌防漢陽地面僅留兵勇二千餘名水陸分防以壯黃州後路聲威此時北省馬隊實難抽調赴皖莫若於九江得手後酌留馬隊固守楚疆其餘由宿太下勦而直達安慶節節掃蕩自可一律殲除奏
八

上命軍機大臣傳諭官文胡林翼曰湖北水陸各軍現

攻九江如卽克復順流可達安慶所有前調赴皖馬
隊著准其暫停調撥卽飭水陸各軍迅將九江郡城
攻克一俟得手卽可直擣安慶與福濟會合進剿

官文胡林翼又奏言九江爲楚北江西安徽三
省咽喉該逆力爭長江恃九江爲總匯而以對
岸黃梅之小池口爲犄角扼險築壘堅不可拔
臣等於克復黃梅後詳查地勢總以先破小池

日爲勝算十二月二十二日探報宿松太湖之
賊三四萬人意圖回竄黃梅又以萬人攻撲雙
城驛又以二萬餘人由余家嘴出蘄水上竄漢
陽都與阿會商王國才等督隊迎勦適臣胡林
翼派鮑超率南勇趕至黃梅軍威益振次日分
投進勦逆衆遙擁出拒我軍縱橫衝擊斃賊數
千敗賊仍竄歸小池口及宿松一帶鮑超等毀

其小池口土城及賊壘數座南岸李續賓與楊
載福連日水陸會攻復將九江外土城轟倒而
重濠疊卡賊蔽如雨我軍未能深入曾國藩於
客臘由豫章至九江面晤都興阿楊載福約會
新正來潯力攻九江臣卽飭知水陸各軍仍先
力攻小池口撤其藩籬刻下江皖各軍已與楚
北聲息相通卽當約期大舉會合夾攻楚北郡

縣現俱收復惟小池口一隅賊壘未破至武漢
省城重地臣更當妥辦善後以固民心而昭慎
重奏八報

同日曾國藩文俊奏言查撫州師潰後臨江之
賊數日增樟樹之警報頻至新淦縣城復爲賊
踞十月二十一日劉于瀉督水師潛往襲之城

池新葺賊望見官軍甚少負嶠固拒劉于瀆等
督軍分門力攻連日晝夜不息復以噴筒射入
頃刻火起城內鼎沸西門亦放火延燒槍礮乘
之聲震山谷各勇緣城而入賊卽開南門逃竄
追逐十餘里殺賊無算其時臨江之賊乘虛來
犯樟樹鎮老營從西岸突出李逢春派船上下
迎擊賊衆敗退自袁州克復後有賊二三千陸

續至臨江在西岸沙湖屯踞撫州樂安復陷有
賊三四千在東岸永泰屯踞聲言欲糾合圍撲
樟樹鎮營盤劉于洵派蔡康業等沿河直上謝
得龍等由隄內包裹專擊東岸之賊衝鋒出戰
賊衆敗卻西岸之賊又出二千餘來犯劉于洵
令礮船排列河口廣勇川貴勇分兩路抄裏斃
其首逆僞張指揮賊盡敗退次日賊出大隊來

犯東西兩岸水陸兵勇登岸衝殺賊衆引退我軍鼓譟乘之殺賊六百餘名二十七日賊復兩岸來犯相約投誠我軍方推心待之該逆忽放排槍傷斃官軍五人各弁勇憤甚登岸力戰我猛進則賊退我稍卻則賊又進回台十餘次斃賊八百餘名苦戰六時之久賊始退遁該逆又於杜家村築礮臺三座用木桶架砌中實以土

外窰深濠十分堅固官軍不得所以破之之法
適臣等派康國器水軍前往二十九日至樟樹
鎮尙未紮營一擁登岸劉于瀆派兵與之同進
該逆分五隊迎拒馬隊當先勢如潮湧劉于瀆
親督兵勇大呼衝陣康國器舁小礮擊必命中
賊稍畏懼劉于瀆施放一窩蠶火箭賊遂潰敗
我軍乘勝追北蔡康業圍攻賊營縱火環燒無

一得脫遂毀其杜家村礮臺三座連日之戰斃賊約六千餘人道員劉于瀉以水陸二千之衆拒兇悍十倍之賊實屬謀勇兼優籲懇

天恩賞加巴圖魯名號蔡康業懇請

賞換花翎其餘出力員弁臣等擇尤保獎奏入

上諭內閣曰江西賊黨復踞新淦縣城經劉于瀉督飭水陸兵勇蔡康業等四面火攻登時克復臨江之賊

屢犯樟樹鎮老營復經蔡康業等奮力擊敗追殺甚多記名道劉于溍著賞給圖薩太巴圖魯名號蔡康業著賞換花翎其餘出力員弁著准其擇尤保奏

曾國藩文俊又奏言臣國藩於十二月初一日由江西省河赴吳城鎮與道員彭玉麟商酌水師進剿事宜適楊載福督水師於十一月二十九日直抵九江焚奪賊船殆盡李續賓督陸師

追剿南岸賊匪於十二月初九日進攻九江府城臣查外江水師上年正月赴湖北援剿是時戰船或入內湖或爲風損僅存一百四十餘號駛至武昌今陸續添至四百餘號李續賓陸軍上年八月赴湖北援剿是時羅澤南李續賓所帶湖寶各營僅五千人今添至八千餘人該二軍馳驅數省轉戰三年所向有功而江甯將軍

都興阿統帶之馬隊亦由北岸以至小池口臣
由吳城馳赴九江迎勞諸軍見其軍威嚴肅士
氣樸誠自十二至十八日環攻六晝夜並未收
隊楊載福李續賓與都興阿聯絡契合愛敬交
至雖積勞之後屢勝之餘猶復日夕兢兢衣不
解帶不特東三省馬隊忠勇可風卽湘營與水
師亦實爲不可多得之勁旅惟是餉項匱乏應

請

飭催山西陝西按月撥解並請

飭下廣東按月酌撥以資軍食奏入

上從之

曾國藩文俊又奏言臣等接據湖南撫臣駱秉

章咨稱派委臣國藩之弟曾國荃帶湘勇二千

人與新授吉安府知府黃冕湖北藩司夏廷樾

廣東羅定協副將周鳳山先後援師進勦曾國
荃由萍鄉入周鳳山由萬載入會攻安福以趨
吉郡十一月十二日周鳳山駐軍楓溪距安福
城四十里探知大嶺小嶺伏有賊匪卽派守備
劉之能等分路進攻殺賊數十名曾國荃於是
日行至江口遇賊迎拒分路擊之殺斃二百餘
名生擒十六人窮追三十里申刻卽抵安福克

復縣城周鳳山入城安撫兩軍均紮東門之外
嗣據探稱通吉安之東路大汾楓田等處屯賊
甚多周鳳山等出隊分三路進兵曾國荃派蕭
孚泗等由中路進周鳳山派劉之能等抄右路
進歐啟貴等抄左路進該逆亦分三股迎敵斃
賊二百餘名該逆敗竄追過大汾河十餘里正
擬移營進剿探知吉城永新有援賊千餘屯聚

固江里田並糾合安福敗匪二千餘竄至竹江
青一帶思踞河以拒我軍周鳳山由河東北徑
擊竹江青之賊曾國荃由樓背洋口幾勦里田
之賊周鳳山行三十里竹江青股匪先遁曾國
荃偵知賊在洋口對河之千金壇山上各弁勇
赤身涉河賊列陣山腰又伏賊出隴中大村冀
擊官軍之旁蕭孚泗等禦中左兩路而張開輯

偃旗蛇行由右路包出賊伏之外羣賊由山半
乘高撲下槍礮兼施我軍屹立不動賊衆下山
甫畢我軍衝鋒擁進衆勇大隊繼之羣賊奔竄
追殺五里至橋東村賊踞石橋相拒思俟伏賊
之勝卓旗回戰不意官軍追騎掩至刀矛相格
張開輯之伏兵從右路抄出伏賊之旁中路之
賊頓失所恃首尾不能相應大敗狂奔我軍窮

追六十餘里外之固江亭子奪獲洋槍礮械籐牌四百餘件殺賊千餘名臣等飭令乘此聲威迅攻吉郡或可得手成上游建瓴之勢以固南嶺天險

曾國藩文俊又奏言饒州餘逆屢次受創之後糾集都昌彭湖各處匪黨八千餘人盤踞鄱陽縣所屬之泥灣一帶防軍都司畢金科等督兵

進勦該逆糾合四五千分五股直撲我軍畢
金科等亦分五路迎敵鏖戰數時該逆抵死不
退畢金科下馬衝入賊陣已革都司岳炳榮由
松嶺之旁潛襲賊後該逆首尾不能相顧我軍
乘勝窮追斃賊四百餘名生擒六十二名十一
月十六日據報前竄饒州之聶張二賊與新到
李邱賊目各帶匪黨來犯官軍營壘畢金科等

以我軍僅二千人賊衆數倍不可力勝但可智
取當派千總龔廷貴等五百餘人於初更時乘
暗潛赴陶溪渡復派百餘人分布各路叢林埋
伏以作疑兵十七日賊分兩路而來一由陶溪
渡一由童子渡龔廷貴等由左路遠包以防童
子渡之賊抄襲後路朱洪章等由右路繞過山
後橫出以截之岳炳榮向前迎敵而自率親兵

策應頃刻開龔廷貴等已抄左路賊後朱洪章等亦將右路之賊截爲兩段叢林中伏兵四起呼聲雷動畢金科縱馬衝突官軍回合力擊無不以一當十賊黨大敗我軍兩路窮追至臥虎山青田埠兩處殲斃及生擒共九百餘名二十三日該逆竄踞線州地方畢金科卽派隊前進甫抵離線州三里該逆兩路列陣而待畢金科

等督隊接戰伏賊齊起勢如潮湧我軍四面受敵幾不能支龔廷貴等躍馬衝陣斬大旗賊目一人中路親兵突起衝擊雜以噴筒火箭該逆敗北畢金科截住橋頭擒斬尤多賊多揭衣渡港我軍投鞭追至村後金龍橋擊斃及生擒千餘名仍飭畢金科等嚴加防守一俟鄂師進攻九江酌量調赴湖口水陸會剿

同日福濟奏言臣行抵廬州所有鄭魁士營內各兵勇一千餘名星速調回以資桐城攻剿秦定三營內抽撥之兵勇四百名暫交副將鮑雲翥扼守廬江先是正月初一初二等日廬州城內居民紛紛遷徙藩司畢承昭等募勇在城外東南門一帶紮營八九座臣抵廬後人心稍定探得賊匪於巢縣夏閣一帶紮營賊黨有八九

萬之多大舉入寇武漢甯國之賊聚集於斯非
攻撲廬州卽乘虛北竄臣所帶之兵不足三千
人其餘勇隊恐難深恃桐城已購有內應之綫
能否成功尙無把握北路捻匪金光飭帶勇勦
辦尙屬得力臣俟廬州賊勢稍鬆卽飭鄭魁士
斟酌辦理均奏入報

十八日辛未官文胡林翼奏言臣等疊奉

諭旨飭籌楚軍進剿機宜查臣等於武漢克復後卽派

李續賓由南岸進剿都興阿等由北岸進剿楊
載福督水師由江路進剿現北岸自黃州至黃
梅南岸自武昌至興國均已肅清崇通一帶亦
俱搜捕殆盡李續賓行抵九江偏城而營與都
興阿力攻六晝夜毀拔城外木城斃賊甚多楊

載福將九江賊船焚燬會國藩由南昌至九江
與李續賓會合進攻惟小池口賊壘尙未攻拔
復派副將鮑超馳往進攻馬步連獲大勝興國
州已派候補知府邢高魁帶勇六營駐紮搜剿
餘孽兼爲李續賓後應安徽之英山太湖宿松
望江皆與湖北接壤賊衆尙多臣等派王國才
駐紮黃梅之大河鋪界嶺嚴截要隘孔廣順駐

紮蘄水之孔隴驛再撥巴揚阿馬隊二百名爲
各路援應以固楚北門戶臣等通籌大局我軍
已據水陸上游若能深固不搖實操破竹建瓴
之勢所可慮者江西七府未平吉安瑞州臨江
南康九江皆與兩楚相近是武昌尙有肘腋之
慮若由通城崇陽興國一帶竄越緊逼武昌反
出九江各軍之上且全師東下不能不以武昌

爲後路根本兵弁之更番換替糧餉軍火之轉
運採辦皆倚武昌且武昌漢陽兩郡一江相望
形勢天成唇齒輔車相爲鎖鑰漢口巨鎮經三
番蹂躪殘破一空必須趕緊招輯撫綏經營建
置使民庶安居商賈復業而後可通百貨而利
轉輸竊念戰守兩端今日勢難偏廢武昌爲全
省之頭目漢陽爲南北之咽喉控制荆襄西通

黔蜀北達豫陝自古皆設重兵以鎮之若捨而弗顧則根本不固枝葉易搖遽議遠征殊非控制之道擬俟司道入城布置嚴定臣胡林翼卽馳往九江與曾國藩相機商辦先清江西七府會合水陸東勦皖江臣官文相機籌畫南北兩軍節節進取仍步步嚴防庶軍行無返顧旁掣之虞

同日何桂清奏言據總兵江長貴稟稱郭村地方距羊棧嶺二十里該總兵馳往督防十二月十四日逆匪由禾成嶺竄入督隊敗之於柏溪次日復敗之於大坦該逆一股竄楓林街一股竄華橋皆係通祁門之路隨令都司余永椿等由金字牌而進該總兵由白塔而進兩路合攻乃該逆已在祁門城外之五里牌三里街二處

築壘盤踞十六日我軍攻破賊壘該逆以馬隊
衝來我軍佯退誘賊至金字牌余永椿等帶勇
突出賊衆驚走退回華橋維時總兵周天受派
兵由石埭來援兵心愈壯翼日該總兵親督各
隊一鼓而進該逆抵敵不住竄往小路口渚口
一帶是夜派兵銜枚直至渚口該逆不知我軍
虛實驚懼潰逃計先後擒斬二百四十餘名各

等語臣思毗連徽甯之太平池州各屬一片賊氛必當分兵力扼要衝因與鄧紹良張芾函商甯國之防以西北兩面爲重徽州之防以西南兩面爲重現在甯國已派知府仲孫懋等帶勇二千九百名駐紮黃池遊擊貴廷芳等帶勇二千五百餘名駐紮灣沚以防蕪湖內犯之路都司吳再升等帶勇一千三百名駐紮南陵千總

文懋官等帶勇五百名駐紮青弋江以防繁昌
銅陵內犯之路遊擊蔣錫光等帶勇九百名駐
紮涇縣縣丞劉福林等帶勇一千五百餘名駐
紮太平以防青陽內犯之路外委劉廷鼐等帶
勇六百餘名駐紮廟埠陳國柱等帶勇五百餘
名駐紮南卡副將蕭知音等帶勇八百餘名駐
紮五里亭以衛郡城鄧紹良自率守備石玉龍

等帶勇四千餘名分紮郡城內外以備策應合
計兵勇一萬五千餘名徽郡派守備羅承勳等
帶兵勇一千四百餘名駐紮祁門以備建德浮
梁守備蔣廷選等帶兵勇七百名駐紮浙嶺已
革參將師長鑣帶勇一千五百名駐紮太白中
雲以備景德樂平江長貴統帶兵勇一千餘名
駐紮漁亭以爲黟祁婺三路聲援周天受統帶

兵勇二千餘名駐紮崇覺寺以防貴池青陽八
徽要隘張芾自率余永椿等帶兵勇一千三百
餘名鎮守郡城居中調度合計兵勇七千餘名
現在祁門竄出之賊與湖北敗匪合併占踞浮
梁景德勢頗颶張恐其復竄徽境已函致鄧紹
良飛飭周天受帶兵回徽堵禦當可無虞均奏
入報

二十五日

戊寅

福濟秦定三鄭魁士奏言查副將

鮑雲翥帶兵馳赴廬江無爲大股賊匪卽於次

日竄入廬江迤東黃姑牯地方本月初四日逆

匪萬餘人竄至城邊分股立營並於六門外築

壘阻絕援軍晝夜攻撲踰濠樹梯鮑雲翥堅守

三月初六日夜間賊衆暗由東門緣城而上施

放噴筒火彈城內民房火起逆衆一擁而進縣
城失陷鮑雲翥巷戰受傷被兵勇救出重圍臣
鄭魁士派遊擊余成蛟帶隊二千馳赴救援詎
余成蛟等行至離城十五里廬江已陷賊知我
軍遠來分路迎撲衛守備洪鍾等躍馬當先衝
入賊隊被賊圍裏登時陣亡余成蛟督令兵勇
開放連環槍礮斃賊百餘名賊勢稍卻適鮑雲

嘉突圍而出合力抵禦至桐邑三十里鋪扼紮以堵後路初九初十等日賊復進至桐城北鄉界河新店一帶連營十餘里密約桐賊前後夾攻使我軍應接不暇十一日城內悍賊由北門出撲兵勇營盤並於前面山岡架礮轟擊臣秦定三督令梁勝章黃國亮等馳往迎勦搶入山岡奪獲大礮躡毀賊營一座其東南之賊又出

撲廣勇營盤守備程友勝督勇埋伏牆內該逆
越過重濠程友勝督勇開礮立斃黃衣賊目拋
擲火罐燒斃不計其數臣鄭魁士督勇衝殺兩
經擊退忽據鮑雲翥等自三十里鋪馳稟廬江
賊匪由新店界杜岡一帶分股來撲一股直抵
三十里鋪呂亭驛阻截我軍援路一股繞至白
沙嶺攔住舒城來路山岡澗坳以及各村民房

俱被占踞見我軍堅守蟻擁圍營漸入濠邊該副將等分投迎擊該逆退半里許復欲整隊來撲等語臣鄭魁士卽督同麟瑞等馳赴追剿賊衆大潰查桐城賊多且悍我軍緊逼城根礙難遽撤而廬江復有大股賊匪在桐營後路層層進紮合力攻犯使我腹背受敵實屬危險萬分惟有竭力支持相機籌辦其陣亡守備洪鍾都

司彭萬鎰應請

旨交部從優議卹廬江縣知縣何輝級請

旨革職仍留署廬江縣事責令帶勇集團迅圖克復奏

八

上諭內閣曰逆匪攻陷廬江縣城守備洪鍾都司彭萬鎰馳往救援被賊圍裏登時陣亡均著交部從優議卹廬江縣知縣何輝級奉派赴鄉籌辦軍糧尙非有

心退避著革職仍留署廬江縣事責令帶勇集團迅
圖克復以觀後效

福濟又奏言臣接曾國藩來函楚師現攻九江
皖省之安慶府與爲犄角擬由江西先撥礮船
二百號協攻安慶以斷賊援等語此時皖北軍
務喫緊儻水路得有一軍可分賊勢且此項礮
船卽可攜帶米糧爲接濟皖軍之用應請

旨飭下曾國藩遴派得力大員督帶礮船下駛並
諭令文俊酌撥米石裝載各船俟商定行期臣卽抽撥
一軍馳往接應庶於兵食兩事均有所裨

同日英桂奏言 臣欽奉寄

諭令派穆騰阿帶察哈爾馬隊五六百名前赴安徽遵
卽抽撥察哈爾二起官兵五百名派令穆騰阿
管帶於正月十六日起程取道太和前赴福濟

軍營助勦均奏入

上命軍機大臣傳諭福濟曰現在廬江復陷賊黨麕至情形實屬喫緊本日據英桂奏已撥馬隊五百名赴皖助勦此外已無可調之兵著福濟督率帶兵各員實力防勦俟江西援兵到日水陸夾攻當有轉機

上又命軍機大臣傳諭曾國藩文俊曰九江安慶相爲犄角曾國藩既有先撥礮船二百隻協攻安慶之議

不但可斷賊援九江之路兼可分桐城後路賊勢現
在安徽賊匪麕至無爲廬江復陷兵力甚單著曾國
藩卽遴派大員督帶礮船下駛以資攻剿至廬州一
帶米糧缺乏並著文俊酌撥米石卽交各船裝載帶
赴皖省俾福濟一軍得有接濟

福濟又奏言廬城周圍三十里設防不易已將
嵩瑞自三河調回派令巡防各門壘據探稱夏

開一帶賊匪時出滋擾意圖北竄其扎隆武東
關之兵一軍孤懸四面皆賊亦突圍而出間有
傷亡臣已飭暫紮廬州隨臣進勦張光第之勇
令紮北山口金光飭聞廬垣緊急亦帶壽勇一
千名趕到令與副將塔思哈帶新募各勇赴柘
皋力堵竄越又派參將圖克臣布等帶兵勇一
千數百名駐紮三河嚴防湖路其郝光甲所帶

聞

陝甘兵九百餘名甫行到省因舒城爲桐營後
路飭令前往扼守又商同秦定三鄭魁士派副
將李德麟統帶水師並練勇八千人由土橋直
擣無爲以分賊勢臣俟兵勇齊抵廬郡布置嚴
定卽親督諸軍直攻東路奏入報

二十六日己卯福興奏言臣行抵廣信疊據探報

浮梁縣屬之景德鎮屯集大股賊匪係甯國敗
竄之餘由祁門奔突而來意在攻撲廣信據在
籍侍郎臣黃贊湯商之於臣必得駐師郡城方
爲有備該逆此時未得我之虛實若大軍遽離
必致乘虛闌入臣查景德鎮竄入之賊其股不
一續來之匪人數多寡未定有已由安仁渡河
趨入東鄉者有仍踞景德鎮分竄樂萬安仁者

前次一聞警信卽令同知李元度就近撥勇向
安仁一帶截勦並添派遊擊畢定邦帶勇馳赴
該處協同堵勦臣一面就現在存城之兵扼紮
駐守使該逆稍戢窺伺之念伏思江右通省軍
務惟東路空虛特甚以目下情形而論東北之
浮樂一帶則亟須議堵東南之撫建兩屬則亟
須議勦而省城西路各軍正在攻勦喫緊之時

斷不能兼顧及此卽協防省會兵勇除調撥各路外固止存有數千勢不能不固根本重地他如所調閩粵兩省之兵亦均緩不濟急臣擬先勦撫建爲順商令曾國藩文俊添兵助力茲據覆稱有進賢貴溪兩軍尙屬就近其應如何調撥進勦各有途徑各有機宜要非至省面商不能折衷定議臣擬布置稍定卽輕騎減從先赴

省垣與會國藩文俊從長計議原帶各兵仍酌
留廣信以資鎮壓設中途遇有緊急卽行飛調
來營亦尙便捷此路距景德稍遠俟探明該處
賊勢所趨信防果能稍鬆臣出省後卽可一意
進攻撫建惟盼此時省西早復一城庶可添集
兵力於堵剿兩事始敷調撥奏入報